

brechte, eyn gnüge thun. Actum sabbato post crucis exaltacionis etc. XXXV^{to}.

a) folgt durchgestrichen Kuchler b) folgt durchgestrichen und c) folgt durchgestrichen bruder d) folgt durchgestrichen czu widirstad e) am rechten Rand, Einfügestelle gekennzeichnet f) wiederholt

830.

1435 November 25

Erbvergleich zwischen Johann Schymmelpfennig, Pfarrer in Schmölln, und Peter Winkler, Bürger in Zwickau.

fol. 150v Actum anno domini MCCCCXXXV^{to} by dem burgermeister Hansze Lasan und syn kumpanen an dem tage der heiligen jungfrauwen Katherinen habin geteydigit Otto von Wyszenpach und Cunrat von der Mosele yn keynwertikeit des burgermeisters und des rathes zwischzen ern Johannes Schymmelpfennig, pfarrer czu Smolen, von vormundeschaft wegin Drobuch, Schymmelpfenniges syns bruder selgen kyndes, uff eyn und Peter Wingkeler, burger zu Czwickkau, und mit synen miterbin uff die andere syte. Alzo das der egnante Peter Wyngkeler gereth und gelobit hat, den egnanten Johansze Schymmelpfennig von syns bruders kinde wegen umbe sulcher gerechtikeit und erbeteylunge wegen, alz daz kynt von synir muter und eldermutter weyn by Peter Wingkeler und synen miterbin in yren gutern hatte und czu getruwer hant von des kyndes wegen den ersamen und wysen burgermeister und rath zu Czwickkau unvorczogenlich zu reichen und czu gebin und czu bezalen 33 β und 20 gr nuwir schildechter fryberger monczcze von dem nehist czu komen sente Walpurgis tag fort obir eyn jar yn der stad Czwickkau an alles geferden. Und davor so hat der genante Peter Wyngkeler dem pfarrer und den burgern alz des kindes getruwe hendere syn husz, by den obern thore gelegin,^{a)} zuwilligem pfande benümet und ingesaczt. Ab er dy bezalunge nicht tette, alz vorgeschr(ieben) stehit, das sy sich von des kyndes wegin des geschr(iebenen) geldes 33 β und 20 gr an dem huse an alle wydirrede irholin sullen, das mogin vorsezczin und vorkauffin an hindirnisze, an argk und an geferde. Und uff eyns sulchz hat sich er Johannes Schymmelpfennig alz eyn rechter vormunde mit rathe und willen ander des kyndes frunde und unsers rathes keyn Peter Wingkelere und synir mit erbnemen vorczihin aller gerechtikeit, dy das kynt czu der czit an des eldervaters, eldirmutter und synir muter gelaszin guter, nictes uzgenomen, gehalten mochte und sich der keyn on vorczihen und uffgelaszen gereth und globit, das daz kynt noch nymand von synen weyn on vordir darin nymmir geredin noch gesprechin sullen an argk und an geferde etc.

a) folgt durchgestrichen gelegin